

Malueng teltelnga ako Jon i wat i

1 Jon

Ritetong nge a 1 Jon

Jon aka ini a Krais ile pakeke i wat malueng ake, na riong pulua aka i voth nge, i ranga ve ini riong aka i voth nge Panongpolong Sivenga aka Jon i wat mun i. Toko powe ninengare olemi ve, Jon i voth a epee a Esia ma i wat malueng ake a toko lemioongare nge aka o voth mun a epee aken. Jon i sis ve aro i pator toko lemioongare nge pamirealonga le apalitetongare (2:26) aka o ri ve, ur areko te thepol i ake ru a ulue na nir peti mun ini ur kerenga, na onir inga ini ur sivenga. Maken o ri mun ve, aro ve te oma vothung kerenga tomo nge nir peti kerenga, ur e avele. Na o ri mun ve, Krais Ioni i lo lelpot tel ini peti lamoko i rin. Pamirealonga le apalitetongare o ri venen aken, aveto Jon i mothongpot ole lemi rumong aka i venen aken. Na i ri ve, aro ve te oma vothung kerenga, aken te avsa a God ile patorong, (3:4) na i ri mun ve, God itutunre o kis inga vothung kerenga omanga avele. (2:28–3:12) Jon i sis rintet ve aro te es a pen lalanga lemi, ranga ve ako Jisas ome Itema a God o voth a pen lalanga nge. Riong aolonga aka i voth a malueng ake lemi i vene: Toko lemioongare aro o es ol a pen lalanga lemi. (1:5-7) Toko e avele i pavurvur aro i ri ve, ilemio a Krais nge, na rongan i kis inga vothung midenga omanga. Aveto toko e aka i nongal ol a God ile patorong, i kene i teo a God nge. (3:14) Na ur aolonga aka i voth a God ile patorong i vene: Aro ar sagu pel naro lemiro nge a Jisas Krais aka ini a God Itun. (3:23) Jon i sis ve aro lemir nine aka ve, toko neneanga a Jisas (1:1; 4:2-3) ini a Mesaia, ini toko aka God i atea i ve aro i el werer ile tokokoere, aka o apet mun i ve ini a Krais, (2:22; 5:1) na ini a God Itun. (2:23; 3:23; 4:9-10; 4:14-15; 5:5-13; 5:20) Na ienga inga i rin mo aro i opoal it mo aro i pamimi it. (5:4-8) Jon i sis ve aro lemir nine aka ve, aro te el mimiong aka aro ile vusonga avele, tova lemiro nge a God Itun. (5:13)

**Aro te es ol a pen lalanga lemi, na te mothong tova te
nongal mideng esngare ole riong**

(Vonge 1:1–3:10)

Riong ako i sung mimiong i velpol ol a pen lalanga.

1 ¹Them wat nge toko aka ulue aka i velpol rongan na i voth tel
lale. Na them nongpol ikei aka i leng leng, na them thepol i nge
thekimem, na them the a i nge, na menimem i vugir mun i. Na ini toko
ako ile riong i sung mimiong a tokokoere nge, na them panongpol thomu
nge ile riong aken. ²Na mimiong tepun aken i velpol ol a pen lalanga,
ma them thepol i ma them ritet nge. Na them panongpol thomu nge toko
aken ve ini mimiong aka aro ile vusonga avele kene tepun, aka nomenga
i voth tomo nge Titemer a God, ma i velpol a them nge lale. ³Na ur aka
them thepol i, na them nongpol i, aken them panongpol mun thomu
nge, mo aka thomu o pavurvur mun aro o supo tomo nge them nge
titeinpeling a menong, na ler titeinpeling a menong aken i voth tomo nge
Titemer a God na Itun a Jisas Krais. ⁴Na them wat riong ake a thomu nge
mo lemire i vual rintet nge lemi sivengaing.

Aro te es inga a pen lalanga lemi.

⁵Na riong aka them nongpol i a Jisas Krais nge, na them panongpol i a
thomu nge, kene i vene: God ini pen lalanga na mideng e avele i voth a i
nge. ⁶Na aro ve te ria ve, te men titeinpeling tomo nge i, aveto rongan ler
vothung i pathengal i aka ve, rongan te es a mideng nge, aken ler riong aken
te ri nge, ini riong le apaltetonga, na te panes a God ile riong nunganga
avele. ⁷Na aro ve te es a pen lalanga lemi, ranga ve aka God i voth a pen
lalanga nge, aken te men titeinpeling tomo nge a God ile tokokoere, na Jisas
ako ini a God Itun ia mla i pariripot ol it nge ler vothung kerenga alavusnga.

⁸Na God i ri lale ve, toko alavusnga o oma vothung kerenga, na aro ve
te ria ve, ler vothung kerenga e avele, aken ler apaltet sivenger, na God
ile riong nunganga i voth a it nge avele. ⁹Aveto aro ve te pamilempot ler
vothung kerengare, aken God aro i panes ile riong aka i kin tomo i nge
it lale, naro i oma vothung vengvenga a it nge, aka aro ilemi simikal ler
vothung kerenga areken, naro i pariri ol it nge ler vothung alavusnga aka
i vengveng a itheki avele. ¹⁰Na aro ve te ri ve te oma vothung kerenga e
avele, aken te apet a God ini toko le apaltetonga, na God ile riong i voth a
ler mimiong nge avele.

Krais ini ler opoalinga.

2 ¹Na tutukre, tho wat riong ake a thomu nge, mo aro o oma vothung
kerenga avele. Aveto aro ve omu e i oma vothung kerenga, kimer

mitnga ake ro i voth ako i ri nge it aka a Titemer a God itheki, ini a Jisas Krais, aka ini toko vengvenga. ²Na i sungpot isivenga ile mimiong aka nge ler vothung kerenga eltetpotnga. Na i oma venen aken nge enger inga avele, aveto i oma mun i nge toko alavusnga ake ru a ulue, ole vothung kerenga eltetpotnga mun.

**Toko aka ilemi mire senu nge ur aka God i sis
ve aro i oma i, aro i panes mun i.**

³Na aro ve te panes a God ile patorongre, aken lemir mire aka ve, lemir mire senu nge ur aka i sis ve aro te oma i. ⁴Na aro ve toko e i ri ve, “Lemik mire senu nge ur aka God i sis ve aro tho oma i.” Aveto i panes a God ile patorong alavusnga avele, toko aken ini toko le apaltetonga, na God ile riong nunganga i voth a i nge avele. ⁵Aveto aro ve toko e i panes senu a God ile riong, aken ile asaguong nge a God i alarorol a ile mimiong. Na lemir mire aka teo a God nge vene: ⁶Toko e aka i ri ve i teo a God nge, aro ile vothung i ranga ve ini a Krais ile vothung.

⁷Na titeik sivengare, ine patorong ake ru tho wat i a thomu nge i ponganga avele. Aveto ini patorong neginga aka thomu o nongpol i nomenga vet aka me i patea nge aka o elo a Krais a lomumu. Na patorong neginga aken ini riong aka thomu o nongpol tel i lale, aka aro omu sagu pel. ⁸Aveto patorong aken aka tho wat i a thomu nge i ponganga mun a thomu nge, na o thepol i a lomu mimiong ranga ve aka ini a Krais ile mimiong. Na o thopol i a lomu mimiong, eneke mideng a esong i penthalu, na pen lalanga a esong i velpol lale ma i to ol.

⁹Na aro ve toko e i ri ve i voth a pen lalanga, aveto rongan ini silal itein lemioonga e, aken toko aken rongan i voth a mideng nge. ¹⁰Na toko aka ia sagu ittein lemioongare, aken i voth a pen lalanga, na ur e avele i voth a i nge aka aro i pamatu i. ¹¹Aveto toko aka ini silal itein lemioonga e, aken i voth a mideng nge, na rongan i es a mideng lemi, na ilemi mire nge wop kathngaka i es nge, kene avele, eneke mideng rongan i pasopal itheki.

¹² Na rongan tho wat riong ake a thomu tutukre aka ini a Krais ile, eneke aka nge a Krais inga, God i eltetpot lomu vothung kerenga.

¹³ Na rongan tho wat riong ake a thomu a vovoengae mun re nge, aka lomu lemioong i motu,

eneke lomumu mire senu nge a Krais aka i voth evelelnga.

Na rongan tho wat riong ake a thomu apoapongare nge, aka lomu lemioong i engeng,

eneke lomu mong a Satan, aka i kerenga selele lale.

Na i nunganga aka tho wat lale a thomu tutukre aka ini a Krais ile, eneke lomumu mire senu nge Titemer a God.

¹⁴ Na tho wat lale a thomu a vovoengae mun re nge, aka lomu lemioong i motu,

eneke lomumu mire senu nge a Krais ako i voth evelengna.
 Na tho wat lale a thomu apoapongare nge, aka lomu lemioong i engeng,
 eneke thomu o engeng, na God ile riong i mimi a lomumu, na lomu mong a Satan, aka i kerenga selele lale.

Te mothong tova ar sagu vothung ulue anga.

15 Thomu o mothong tova omu sagu vothung ulue angare, eve ur areko i voth mun nge. Eneke aro ve omu e ia sagu vothung ulue anga, aken God iasagunga i voth a i nge avele. 16 Na i venen aken, eneke vothung alavusnga aka ini toko ulue angare ole, i es a Titemer a God nge me avele, ranga ve ini aka o panes inga vothung areko i mita a olemi me, na o theseal, na o magon. Vothung alavusnga areken ini vothung ulue anga vet aken. 17 Na ine ulue ake tomo nge areko oa sagu vothung ulue anga aro o vus, aveto tokokoe areko o oma ur areko God i sis ve aro o oma i, aro ole mimiong aro ile vusonga avele.

Krais ile ngarangre o velpol lale.

18 Na tutukre, te tothtunol ol nang le vusonga lale. Na ranga ve aka o nongpol aka ve, Krais ile ngarangre aro i es me, na ponange ol ake Krais ile ngarangre pulua o velpol lale. Na nge aken, lemire mire aka ve, te tothtunol nang le vusonga. 19 Na tokokoe areken nomenga o voth tomo tel nge it, lama o lo lelpot ar ma o es. Aveto or ini lerenga nunganga avele. Eneke aro ve or ini lerenga, aro rongan o voth tomo nge it. Aveto o lo lelpot ar lale, make i nunganga aka ve, or ini lerenga avele.

20 Aveto thomu o el Oni Riringa lale aka a Toko Riringa nge me, na i panine lomumu mo aka lomumu mire nge riong nunganga aka God i pathengal i a it nge. 21 Ava lomumu ve tho wat a thomu nge, eneke lomumu mire nge riong nunganga avele, aveto avele. Tho wat a thomu nge, eneke lomumu mire nge riong nunganga lale, na lomumu mire mun aka riong nunganga i pavelpol riong le apaltetonga e avele. 22 Toko le apaltetonga ini anga? Ini toko aka i kelelal ve, Jisas ini toko aka God i ategal i ve aro i el werer ile tokokoere, kene avele. Na toko aka i venen aken, ini a Krais ile ngarang. Ma i lel ikime nge Titemer a God na Itun a Jisas. 23 Na toko aka i lel ikime nge a God Itun aken, akennga i lel mun ikime nge Titemer a God. Na toko aka ilemio nge a God Itun, akennga i lemio mun nge Titemer a God.

Oni riringa i pamireal it nge riong nunganga.

24 Na riong areko thomu o nongpol i nomenga nomenga vet aka me i patea nge aka o elo a Krais a lomumu, kene aro thomu o krim engeng i. Na aro ve thomu o krim engeng inga, aken rongan o teo a Jisas nge na a Titemer a God nge. 25 Na ake ini ur aka i kin ile riong a it nge lale ve aro i sungu mimiong aka aro ile vusonga avele a it nge.

²⁶Na tho wat riong areken a thomu nge mo tho pator lomu nge tokokoe areko o tongporum ve aro o paleklek thomu. ²⁷Aveto thomu o el Oni Riringa a God nge me, na rongan i voth a lomumu, make o mothong tova o sis ol pamirealinga e, eneke Oni Riringa ienga inga aksa i pamireal thomu nge ur alavusnga. Na Oni Riringa aken ile omaing i nunganga na ile apalitet avele. Maken aro thomu o kis inga lomu teoong a Krais nge ranga ve aksa Oni Riringa i pamireal thomu nge.

Na ponange te voth ol ini a God itutunre.

²⁸Na tutukre, aro thomu o pesrou avele nge lomu teoong a Krais nge, moro aken nge nang aksa aro i velpol a pen lalanga, aro te mit engeng, naro ler mara nge mitong a itheki avele, aksa nge ile esuong me.

²⁹Na lomumu mire aksa ve, Krais ile vothung alavusnga i vengveng rintet, aken aro lomumu mire mun aksa ve, toko alavusnga aksa o oma vothung vengvenga, or ini a God itutunre ol lale.

3 ¹O, ken! O thepol vet Titemer a God ile asaguong aolonga aksa i sangu i ait nge, make i apet it ini itutunre ol! Na i nunganga aksa it ini a God itutunre ol! Aveto toko ulue angare o ate it ve ini itutunre avele, eneke olemi mire nge a God avele. ²Na titeik sivengare, te voth ol ini a God itutunre, aveto ler mimiong panen anga aken o panine mos i ait nge rongan. Aveto lemire mire aksa ve, panen tova Jisas i velpol, aro te velpol ranga ve ini mun i i, eneke aro te thepol i aksa ve, i kene ini a God. ³Na toko alavusnga aksa o men sial tomo nge ole lemoiong nge ur aken, o oma inga vothung riringa mo o riri ranga ve aksa Krais i riri.

⁴Na tokokoe areko o mosal inga nge vothung kerenga omanga, o avsa a God ile patorong. Na i nunganga aksa vothung kerenga omanga ini vothung aksa i avsa a God ile patorong. ⁵Aveto lomumu mire aksa ve, Krais i velpol mo aksa aro i eltetpot ler vothung kerenga areken. Na vothung kerenga e avele i voth aksa nge. ⁶Na aro ve toko e i teo a Krais nge, aro i mos ol nge vothung kerenga omanga ol avele. Aveto aro ve toko e i mosal inga nge vothung kerenga omanga, aken lemire mire aksa ve, ilemi mire nge a Krais avele, na i elo i a ilemi rongan.

⁷Na tutukre, aro thomu o naktet thomu, aro vene mo toko e aro i paleklek thomu. Na toko aksa i mosal inga nge vothung vengvenga omanga, ini toko vengvenga ranga ve ini a Krais aksa ini toko vengvenga. ⁸Na toko aksa i mostun inga nge vothung kerenga omanga ini a Satan ile, eneke nomenga vet aksa me i patea nge ur alavusnga patenga, Satan i mosal inga nge vothung kerenga omanga. Na tepun aksa God Itun i velpolu ake, mo aro i pakerenga a Satan ile omaing. ⁹Na toko aksa i velpol ini a God itun lale, aro i mos ol inga nge vothung kerenga omanga avele, eneke God ile mimiong i voth aksa nge, na i pavurvur aro i panes ol vothung kerenga avele, eneke i velpol ini a God itun lale. ¹⁰Naro lemire mire nge toko kathnga aksa ini a God itun, na toko kathnga

ako ini a Satan itun kene vava? Toko e ako i oma vothung vengvenga avele eve ia sagu ititeinre avele, aken ini a God itun avele.

It omole omole aro ar sagu tokokoere

(Vonge 3:11–5:21)

I sivenga aka aro ar sagu pel.

¹¹ Na riong e ako thomu o nongpol i nomenga vet ako me i vene: Aro ar sagu pel. ¹² Na te mothong tova it ranga ve ini a Kein, aka ini a Satan ile toko, aka ini silal itein, mako i so rin i. Na i vava aka i so rin itein, e? I so rin i, eneke ini silal i, eneke isivenga ile vothung i kerenga, na itein ile vothung i vengveng. ¹³ Na titeikre, aro ve toko ulue angare oni silal thomu, aken aro o mothong tova o kukuk nge. ¹⁴ Na lemire mire ako ve, te lo lelpot rinong lemi lale, na te es ol a mimiong lemi, eneke ar sagu titeir lemioongare. Na toko e aka ia sagu avele, rongan i voth a rinong lemi. ¹⁵ Na toko e aka ini silal itein lemioonga e, aken ini toko aka i so rin toko aka a God itheki. Na lomumu mire aka ve, toko aka i so rin toko, mimiong aka aro ile vusonga avele, kene i voth a i nge avele.

¹⁶ Na lemire mire nge aka asaguong ini vothung le vanga, e? Eneke Jisas Krais i sungpot isivenga ile mimiong, mako i rin mo aka aro i opoal it. Na ile vothung aken i pathengal it nge vothung aka nge asaguong. Na it mun aro te sungpot mun sivenger ler mimiong mo aro i opoal titeir lemioongare. ¹⁷ Na aro ve toko lemioonga e aka ile ur elonga i voth, na i thepol itein lemioonga e aka i oror nge ur e, na aro ve i opoal i avele, aken lemire mire aka ve, God ile vothung aka nge asaguong i voth a i nge avele. ¹⁸ Na tutukre, te mothong tova ar sagu titeir lemioongare nge riong inga nge wor, aveto aro te opoal or nge ur pelie aka o oror nge, aka ranga ve God ile riong nunganga i ri nge.

It toko lemioongare aro te mit engeng a God itheki.

¹⁹ Na aro ve ar sagu titeir lemioongare venen aken, aken lemire mire aka ve, te voth a God ile riong nunganga lemi. Na nge aken te pavurvur aro te ngeip nge mitong a God itheki avele. ²⁰ Na aro ve opor lemi i teltun ar nge ur pelie, ur e avele, eneke God i aolonga nge ur areken i voth a opor lemi, na ilemi mire nge ur alavusnga aka ru i voth a it nge. ²¹ Na thomu areko ok sagu thomu, aro ve opor lemi i teltun ar avele, aken aro te mit engeng a God itheki, ²² naro te el ur kathnga aka te nong i a i nge, eneke te panes ile patorong, na te oma vothung aka ilemi sivenga nge. ²³ Na ile patorong i vene: Aro lemiro nge Itun a Jisas Krais, naro ar sagu pel ranga ve aka i tor ler nge. ²⁴ Na aro ve toko e i panes a God ile patorong, aken

i teo a God nge, na God i teo mun a i nge. Na lemire mire ako God i teo a it nge vava? Eneke Ioni Riringa aka i sungu i a it nge kene i pathengal it nge ler teoong aken.

**Aro te tongporum vet panongpolong elonga
ako i es a God nge me eve avele.**

4 ¹Na titeik sivengare, riong elnga le apaltetonga pulua o esu esa a pen elonga, ma o panongpol. Na o mothong tova lomumuo nge toko alavusnga aka o ri ve, God Ioni i voth a or nge, kene ole panongpolong. Aveto aro thomu o tongporum vet or nge ole panongpolong aken, aka i es a God nge me eve avele. ²Naro thomu o ate nge a God Ioni vava, e? Aro thomu o nongpol senu nge ole panongpolong. Na aro ve o ri ve Jisas Krais i velpol ini toko nunganga ake ru a ulue, aken ini toko aka God Ioni i voth a i nge. ³Aveto tokokoe areko o oma riong aka i venen aken avele nge a Jisas, aken tamata le apaltetonga i voth a or nge, na o es a God nge me avele. O ranga ve ini a Krais ile ngarang aka nomenga o nongpol i aka ve, aro i es me, na ponange i velpol ol a ulue lale.

⁴Na thomu tutukre, thomu ini a God ile na lomu mong or lale. Eneke God Ioni aka i voth a thomu nge, kene ile engenging i aalonga rintet nge a Satan aka i voth a ulue ake, kene ile engenging. ⁵Na o ri inga nge ur ulue anga, eneke o panes inga vothung ulue anga, make areko o panes vothung ulue anga o nongal inga ole riong. ⁶Aveto it aka ini a God ile. Na areko olemi mire nge ur aka God i sis ve aro o oma i, aro o nongal ler riong. Aveto areko or ini a God ile avele, aro o nongal ler riong avele. Na nge vothung inga aken, te pavurvur aka aro te ate nge Oni Riringa aka i pavelpol riong nunganga, na tamata kerenga areko o pavelpol riong le apaltetonga.

Aro ar sagu tokokoere, eneke God ia sagu tel it.

⁷Na titeik sivengare, aro ar sagu pel, eneke vothung aka nge asaguong i es a God nge me. Na toko e aka ia sagu tokokoere, ini a God itun aka God i pavelpol mimiiong ponganga a i nge, na ilemi mire senu nge ur aka God i sis ve aro i oma i. ⁸Na toko e aka ia sagu tokokoere avele, aken ilemi mire nge ur aka God i sis ve aro i oma i, kene avele, eneke God ilemi alavusnga ini asaguong popepenga. ⁹Na God i pathengal it aka ve, ia sagu rintet it, nge aka i pakeu Itun omolenga aken, a ulue me mo i sung mimiiong aka aro ile vusonga avele a it nge, aka nge ile rinong. ¹⁰Na vothung aka nge asaguong kene i vava, e? Ini vothung aka ar sagu a God, kene avele. Aveto ini vothung aka God ia sagu it, mako i pakeu Itun aken me, mo i sungpot isivenga ile mimiiong, aka nge ler vothung kerenga eltetpotngga. ¹¹Na titeik sivengare, God ia sagu it venen aken, mako i sivenga aka aro it mun aro ar sagu pel. ¹²Na toko e avele i thepol a God. Aveto aro ve ar sagu pel, aken God i voth a it nge, na ile vothung aka nge asaguong i alarorol a it nge.

¹³Na lemir mire ako ve, te teo a God nge, na God i teo mun a it nge vene: Eneke i sungu isivenga Ioni a it nge. ¹⁴Na te thepol ur aka God i oma i lale, aka ranga ve i pakeu Itun me, mo i velpol ini toko alavusnga ake ru a ulue ole Pamimionga, make te panongpol ol nge aken. ¹⁵Na aro ve toko e i nutun ve, Jisas ini a God Itun, aken God i teo a i nge, na i teo mun a God nge. ¹⁶Make ranga ve te thepol a God ile asaguong a it nge, na lemiro nge ile asaguong aken.

God ilemi alavusnga ini asaguong popepeng. Na toko e aka i mimi a asaguong lemi, aken i teo a God nge, na God i teo mun a i nge. ¹⁷Na aro ve te teo a i nge venen aken, vothung aka nge asaguong, kene i alarorol a ler mimiiong, eneke it ranga ve ini a Krais ake ru a ulue. Na i venen aken, mako aro te mit engeng nge nang aka aro te mit nge riong a God itheki. ¹⁸Na asaguong aka i venen aken, ngeipong i voth a lemi avele, eneke aro ve vothung aka nge asaguong i voth engeng a toko e nge, aken i eltetpot ngeipong a i nge. Maken aro ve toko e i ngeip nge a God, aken ile asaguong nge a God i alarorol avele, eneke rongan i ngeip nge a God ve aro i paomelal i nge ile vothung kerenga.

¹⁹Na it kene ar sagu a God tomo nge tokokoere, eneke God ia sagu tel it a mukaling. ²⁰Na aro ve toko e i ri ve ia sagu a God, aveto ini silal itein lemioonga e, aken ini toko le apaltetonga, eneke toko e aka ia sagu itein avele aka i thepol i nge itheki, i pavurvur mun avele aka aro ia sagu a God aka i thepol i nge itheki avele. ²¹Na patorong aka te el i a i nge, kene i vene: Toko aka ia sagu a God, aro ia sagu mun itein lemioongare.

It toko lemioongare ler mong vothung ulue anga ile engenging.

5 ¹Na toko alavusnga aka olemio ve, Jisas ini toko aka God i ateal i ve aro i el werer ile tokokoere, aken or ini a God itutun areko i pavropol mimiong ponganga a or nge. Na toko alavusnga aka oa sagu Titemer a God, akennga aro oa sagu mun itutunre. ²Naro lemir mire ako ve, ar sagu rintet a God itutunre vava, e? Eneke ar sagu a God na te panes ile patorong alavusnga. ³Na aro ve ar sagu a God, aken aro te panes mun ile patorong alavusnga. Na ile patorong areken i pavurvur aro i sungu matheong a it nge avele. ⁴Eneke it ini itutun areko i pavropol mimiong ponganga a it nge, na ler mong vothung ulue anga. Na ler mong vothung ulue anga aken lale, aka nge ler lemioong nge a God. ⁵Na anga i pavurvur aka aro ile mong vothung ulue anga, e? Ini inga areko olemio ve, Jisas ini a God Itun.

God i ritet nge Itun.

⁶Na lemir mire aka ve, Jisas Krais ini a God Itun aka nge paatealing or aini.^a Na omole i velpol nge aka i es me ma i el paninuong nge thei. Na aininga

^a **5:6** Lemir mire senu avele, aveto ava paatealing or aini ake kene i ri nge a God ikei aka i espot a Pen a Urvet me. O thepol a Matiu 3:17 and Jon 12:28.

i velpol nge ako ia mla i palalas a won ngoronga nge. Na lemire mire ako ve, Jisas ini a God Itun nge paatealing omole inga ako nge paninuong elnga, kene avele. Aveto lemire mire ako ve, ini a God Itun nge paatealing or aini, aka nge paninuong elnga tomo mun nge ia mla aka i palalas a won ngoronga nge. Na Oni Riringa mun kene i ritet mun it nge venen aken. Na lemiro nge ile riong aken, eneke ile riong alavusnga i nunganga inga. ⁷Na ur or me aken o ritet ve, Jisas ini a God Itun. ⁸Na ur or me aken ini Oni Riringa, paninuong, na ia mla, na or alame aken ole ritetong i thun inga. ⁹Na i nunganga aka it tokokoere lemiro nge riong aka tokokoere o ritet it nge. Aveto riong aka God i ritet it nge, kene i mukal nge ole riong, eneke i es aken a God nge me, na ini a God aka i ritet it nge Itun. ¹⁰Mako toko e aka ilemio nge a God Itun, aken i elo a God ile riong aken a ilemi lale. Aveto toko e aka ilemio nge a God ile riong avele, i ranga ve aka i apet a God ini toko le apaltetong, eneke ilemio avele nge a God ile riong aka i ri nge Itun. ¹¹Na riong nunganga aka God i ritet i a it nge lale kene i vene: God i sungu mimiong aka aro ile vusonga avele a it nge lale. Na mimiong aken tepun i voth inga a Itun nge. ¹²Mako toko e aka i elo a God Itun a ilemi, aka nge ile lemioong nge i, aken i el mun mimiong aka aro ile vusonga avele a i nge. Aveto toko e aka i elo a God Itun a ilemi avele, aken mimiong aka aro ile vusonga avele, kene i voth a i nge avele.

**I pavurvur aro lemire mire ako ve, mimiong aka aro
ile vusonga avele, kene i voth a it nge lale.**

¹³Na tho wat lek riong vene ake, na tho wat i a thomu areko lomumuo nge a God Itun, mo aka aro lomumu mire ako ve, thomu o el mimiong aka aro ile vusonga avele lale. ¹⁴Mako te mit engeng a God itheki, eneke lemire mire ako ve, aro ve ler nongong i panes ilemi, aken aro i nongpol ler nongong aken. ¹⁵Na aro ve lemire mire ako ve, i nongpol ler nongong aken, aken lemire mire mun aka ve, ur kathnga aka te nong i a i nge, kene aro i sungu i a it nge.

¹⁶Maken aro ve toko e i thepol itein lemioonga e aka i matu nge vothung kerenga, aveto vothung kerenga aken i pavurvur nge esuong a won sesenga nge avele, aken i sivenga aka aro i nong a God nge ve aro i opoal toko aken. Naro God i pavelpol werer ile mimiong aka i panes a Krais nge. Na tho ri inga ake nge tokokoe areko o oma vothung kerenga aka i pavurvur avele nge esuong a won sesenga nge. Ine vothung kerenga e aka i voth aken i pavurvur aro i paeso toko a won sesenga nge.^b Na tho ri ve aro thomu o nong nge toko aka i oma vothung aken, kene avele.
¹⁷Ine vothung alavusnga aka i vengveng avele, ini vothung kerenga. Na

^b **5:16** Toko powe ninengare o ri ve vothung kerenga aka i paeso toko a won sesenga nge i ranga ve aka o lel okime nge a God, eve oni silal a God itutunre, eve o apet a God ini toko le apaltetong.

vothung kerenga pelie ako i voth aka aro i paeso toko a won sesenga nge avele.

¹⁸Na lemir mire aka ve, toko alavusnga areko or ini a God itutunre aka i pavelpol mimiong ponganga a or nge, kene aro o mos ol nge vothung kerenga omanga ol avele. Aveto evelelnga God Itun i paseral ole, na Satan aka i kerenga selele, kene i pavurvur aro i pakerenga or avele.

¹⁹Na lemir mire mun aka ve, it ini a God itutunre, aveto ulue alavusnga ake i voth a Satan ile engenging lemi. ²⁰Na lemir mire mun aka ve, God Itun i es me lale, na i sungu lemi rumong ninenga a it nge, mo aka aro lemir mire senu nge ur aka God nunganga i sis ve aro te oma i. Na te teo a God nunganga nge, aka nge ler teoong a Itun a Jisas Krais nge. Na Jisas Krais ini a God nunganga. Na ini mimiong aka aro ile vusonga avele kene tepun.

²¹Maken tutukre, aro thomu o voth melanga nge god le apaltetongare olotualnga.

Na i re aken. I vus.